

Na osnovu člana 8 i člana 13. Zakona o principima lokalne samouprave u Federaciji BiH („Službene novine Federacije Bosne i Hercegovine“, br.: 49/06 i 51/09), člana 16 i 17 Zakona o poticaju razvoja male privrede („Službene novine Kantona Sarajevo“, br. 29/15), člana 17 i 33. Statuta Općine Novi Grad Sarajevo („Službene novine Kantona Sarajevo“, br: 30/09 - novi prečišćeni tekst i 2/17) i Odluke o usvajanju revidirane Strategije razvoja Općine Novi Grad Sarajevo (2014-2020.) sa Akcionim planom prioriternih projekata i mjera za period 2017-2020. godine („Službene novine Kantona Sarajevo“, br: 18/17), Općinsko vijeće Novi Grad Sarajevo na 13. sjednici održanoj dana 25.01.2018. godine, donosi:

NACRT

**ODLUKE
O PODSTICAJIMA PRIVREDI I ZAPOŠLJAVANJU TERITORIJI
OPĆINE NOVI GRAD SARAJEVO**

**Član 1.
(Predmet Odluke)**

S ciljem podrške bržeg lokalnog ekonomskog razvoja, ovom Odlukom se uređuju mjere podsticaja privredi i zapošljavanju na teritoriji općine Novi Grad Sarajevo te utvrđuje finansijski okvir, korisnici mjera i druge odredbe od važnosti za efikasnu provedbu.

**Član 2.
(Svrha donošenja Odluke)**

Općina Novi Grad Sarajevo, kao proaktivna lokalna samouprava i nosilac međunarodnog certifikata BFC SEE „Općina sa povoljnim poslovnim okruženjem,“ ovom Odlukom trajno podstiče dinamiku zapošljavanja i razvoj lokalne privrede, definisano kroz strateški prioritet Strategije razvoja Općine Novi Grad Sarajevo 2014-2020. i Akcioni plan 2017-2020. godine.

**Član 3.
(Finansijski okvir)**

Finansijska sredstva za realizaciju ove Odluke osiguravaju se u Budžetu Općine Novi Grad Sarajevo.

**Član 4.
(Podsticajne mjere)**

Služba za privredu i lokalni ekonomski razvoj vrši planiranje, provedbu, monitoring i dostavljanje informacije o realizaciji ove Odluke Općinskom vijeću.

Navedena Odluka se realizuje putem sljedećih podsticajnih mjera:

1. Podsticaj privrednim subjektima putem regresiranja dijela kamatne stope
2. Podsticaj START UP firmama putem regresiranja dijela kamatne stope uz mogućnost korištenja kreditno-garantnog fonda
3. Sufinansiranje zapošljavanja pripravnika

4. Sufinansiranje obuke nezaposlenih osoba za poznatog poslodavca
5. Sufinansiranje troškova samostalnih poduzetnika - početnika u biznisu
6. Podrška za uvođenje certifikata, međunarodnih standarda i dr.
7. Podrška očuvanju starih tradicionalnih zanata, obrta i deficitarnih zanimanja
8. Promocija privrede i lokalnog ekonomskog razvoja
9. Projekti od značaja za lokalni ekonomski razvoj (učesće u domaćim i međunarodnim projektima iz oblasti privrede i zapošljavanja, partnerski projekti s drugim institucijama, JU Službom za zapošljavanje Kantona Sarajevo, organizacijama i poslodavcima, organizovanje nagradnog fonda za finansiranje najboljih biznis planova, organizacija sajmova i drugo shodno aktuelnim potrebama).

Član 5. **(Korisnici mjera)**

Pravo apliciranja za korištenje podsticajnih mjera imaju sljedeći korisnici :

1. „Podsticaj privrednim subjektima putem regresiranja dijela kamatne stope“: Privredna društva i samostalni poduzetnici, koji imaju sjedište ili poslovnu jedinicu na području općine Novi Grad Sarajevo ili se nalaze u procesu preregistracije sjedišta na teritoriju ove općine.
2. „Podsticaj START UP firmama putem regresiranja dijela kamatne stope uz mogućnost korištenja kreditno-garantnog fonda“: Fizička lica uz izrađeni biznis plan, koja imaju prebivalište na teritoriji općine Novi Grad Sarajevo ili se nalaze na evidenciji Službe za zapošljavanje KS -Biro Novi Grad Sarajevo (Biro Novi Grad Sarajevo) i/ili firme osnovane unazad godinu dana s sjedištem na teritoriji općine Novi Grad Sarajevo.
3. „Sufinansiranje zapošljavanja pripravnika“: Privredna društva i samostalni poduzetnici s teritorije općine Novi Grad Sarajevo, koji su aplicirali i ispunili uslove na Javnom pozivu Službe za zapošljavanje KS.
4. „Sufinansiranje obuke nezaposlenih osoba za poznatog poslodavca“: Privredna društva, samostalni poduzetnici i/ili Centri za obuke, dokvalifikacije i prekvalifikacije koji obučavaju i/ili zapošljavaju isključivo osobe s Biroa Novi Grad Sarajevo.
5. „Sufinansiranje troškova samostalnih poduzetnika - početnika u biznisu“: Lica koja imaju prebivalište na općini Novi Grad Sarajevo ili se nalaze na Birou Novi Grad Sarajevo, a koji su u tekućoj godini registrovali obrt, trgovinsku ili ugostiteljsku radnju. Prednost imaju samostalni poduzetnici sa sjedištem na teritoriji općine Novi Grad Sarajevo.

6. „Podrška za uvođenje certifikata, međunarodnih standarda i dr.“: Privredna društva s teritorije općine Novi Grad Sarajevo, a koji za potrebe poboljšanja poslovanja ili izvoza trebaju obezbijediti certificirane proizvode i/ili usluge, odnosno ojačati poslovne performanse.
7. „Podrška očuvanju starih tradicionalnih zanata, obrta i deficitarnih zanimanja“: Sektor starih tradicionalnih zanata, obrta i deficitarnih zanimanja na tržištu rada općine Novi Grad Sarajevo i Kantona Sarajevo.
8. „Promocija privrede i lokalnog ekonomskog razvoja“: Firme koje posluju na teritoriji općine Novi Grad Sarajevo.
9. „Projekti od značaja za lokalni ekonomski razvoj“: Svi korisnici od značaja za provedbu programa ili projekta u svrhu lokalnog ekonomskog razvoja, a po prijedlogu Službe za privredu i lokalni ekonomski razvoj.

Član 6. (Procedure)

Podsticajne mjere koje se provode putem javnih poziva:

- Podsticaj privrednim društvima putem regresiranja dijela kamatne stope
- Podsticaj START UP kompanijama putem regresiranja kamatne stope i uz mogućnost korištenja kreditno-garantnog fonda
- Sufinansiranje obuke nezaposlenih osoba za poznatog poslodavca
- Sufinansiranje troškova samostalnih poduzetnika - početnika u biznisu
- Podrška za uvođenje certifikata, međunarodnih standarda i dr.

Podsticajna mjera koja se provodi za privredna društva i samostalne poduzetnike sa teritorije općine Novi Grad sa odabrane liste Službe za zapošljavanje KS nakon provedenog javnog poziva:

- Sufinansiranje zapošljavanja pripravnika

Podsticajne mjere na osnovu podnesenih zahtjeva za zajedničko učešće ili podršku projektu:

- Podrška očuvanju starih tradicionalnih zanata, obrta i deficitarnih zanimanja
- Promocija privrede i lokalnog ekonomskog razvoja
- Mjere i projekti od značaja za lokalni ekonomski razvoj

Korisnici podsticajnih mjera sa Općinom Novi Grad Sarajevo zaključuju Ugovore kojim se regulišu međusobna prava i obaveze ugovornih strana.

Član 7.
(Posebni uslovi)

Općinski načelnik u roku od 30 dana od dana stupanja na snagu ove Odluke donosi Pravilnik, a na prijedlog nadležne Službe, kojim propisuje posebne uslove, kriterije i način provedbe ove Odluke.

Član 8.
(Završne odredbe)

Ova Odluka stupa na snagu danom donošenja, objavljuje se na oglasnoj ploči Općine Novi Grad Sarajevo i u Službenim novinama Kantona Sarajevo.

Broj: 01-02-_____/18
Sarajevo, _____ 2018. godine

PREDSJEDAVAJUĆI
OPĆINSKOG VIJEĆA

dr. Rusmir Baljić